

Iniziativa da chatscha sulet per part valaivla

L'iniziativa per ina chatscha etica e cumpurtabla cun la natira n'ha chattà nagin sustegn

■ (anr/ac) Il suveran grischun vegn a decider sulet dad ina part da la Iniziativa per ina chatscha etica e cumpurtabla cun la natira. Intgins puncts da l'iniziativa ha il cussegl grond declerà per nunvalaivels. E dal rest da l'iniziativa n'è il cussegl grond betg stà incantà e propoia al suveran da refusar ella.

Gronda discussiun n'ha la Iniziativa per ina chatscha etica e cumpurtabla cun la natira betg levantà il glindesdi passà en il cussegl grond. Deputadas e deputads èn suandads bunamain unanim las propostas da la regenza e da la cumissiun predeliberanta. Els han acceptà ils parais giuridics che han stipulà tschertas pretensiuns da l'iniziativa per betg cumpatiblas cun il dretg subordinà principalmain vers las leschas federalas da chatscha e da guaud e vers la constituiun. Per exempel la pretensiun da l'iniziativa per ina represchentanza paritetica da chatschaders e betg chatschaders en l'administraziun da l'Uffizi chantunal da chatscha. Ina pretensiun che sa drizza cleramain vers la Constituziun federala ed è tenor las explicaziuns dal president da la cumissiun predeliberanta *Walter Grass* (pbd Tusaun) discriminanta. Eler persunal tenor criteris ideologics u politics contraditgia cleramain a la constituiun. I na saja betg lubì da sclauder ina persuna dad ina piazza per via da sia opiniun. Il cussegl grond e suandà las explicaziuns dal *Grass* ed ha mede-



La chatscha grischuna stat momentan en il focus da la politica grischuna. L'iniziativa per ina chatscha etica e cumpurtabla cun la natira n'ha betg chattà amis en il cussegl grond ed ella cuntegn divers aspects dispitaivels.

FOTO Y. BÜRKLI

mamein valità quella pretensiun da l'iniziativa per nunvalaivla. L'ulteriur punct da l'iniziativa da pretender ina represchentanza paritetica en la cumissiun da chatscha è vegnì taxà per valaivel. E tuttina ha

il cussegl grond decedì da na proponer al suveran dad acceptar quella pretensiun. Cussegljer guvernativ *Mario Cavigelli* ha fatg attent che criteris dal fatg sajan decisivs per ina commemoranza en la cumis-

siun chantunala da chatscha e na ideologias. Già ussa sajan divers interess sco la protecziun dals animals e da la natira, da l'agricultura e dal guaud represchentads en quella cumissiun.

Decider davart l'accompagnament dals affons sin chatscha

L'iniziativa per ina chatscha etica e cumpurtabla cun la natira pretenda vinavant da scumandar a geniturs che van a chatscha da prender cun els ils uffants enfin la vegliadetga da dudiesch onns ed els na dastgan betg vegnir motivads da la scola per la chatscha. Tenor las explicaziuns dal president da la cumissiun, *Walter Grass*, saja quai bain ina ferma intervenziun en ils dretgs dals geniturs, tenor ils parais dals experts dentant cumpurtabel cun il dretg superiur ed en quel senn valaivel e da suttametter a la votaziun dal pievel. Il cussegl grond propoia tuttina da renviar quel punct cun l'entira iniziativa. El ha decì en la votaziun finala da declerar quatter pretensiuns da l'iniziativa per betg valaivlas, ni parzialmain betg valaivlas. Sper las già menziunadas èn quai las pretensiuns per ina protecziun generala da vatgas tscharva e chavreuls che portan sco animals giuvens e da pretender ina protecziun generala per tscharvas d'avent da l'emprim da november enfin l'entschatta da la chatscha. Ils motivs per declerar quels puncts per nunvalaivels èn la protecziun dal guaud giuven ed ina populaziun da selvaschina che na pudess betg pli vegnir reglada sufficientamain. La proposta da declerar parts da l'iniziativa per nunvalaivas e da proponer al suveran da renviar l'ulteriura part da l'iniziativa han 112 deputadas e deputads sustegnì.